

## Communicaziun a las medias

### Seria-web «Metta da fein»: In mitus vegn leventà da mort en vita

Cuira, ils 08-12-2020 - **In mitus ed in vitget en agitaziun: Dumengia, ils 13 da december, a las 20:15, èsi uschè lunsch. Radiotelevision Svizra Rumantscha (RTR) mussa l'emprima seria-web rumantscha «Metta da fein». Il crimi umoristic en quatter parts è da vesair sin las plattafurmas «rtr.ch» e «Play Suisse».**

En in vitget en Surselva vegnan regularmain chattads animals cun chommas tagliadas giu. La pitschna cuminanza è tementada. Entant che plirs abitants crain vi d'in mitus emprova il policist da sclerir il cas, quai però senza success. Ils mazzaments s'augmentan sco er la disfidanza dals abitants dal vitg. La seria finescha cun ina catastrofa durant la festa dal vitg. La seria è vegnida filmada dals 20 da zercladur enfin ils 5 d'avust en ils vitgs da Vrin e Lumbrein en Val Lumnezia. La seria-web è vegnida producida da RTR en collavuraziun cun la firma da produzioni «Filmgerberei GmbH» ed ils dus reschissurs Carlo Beer ed Urs Berlinger.

#### Ils reschissurs Carlo Beer ed Urs Berlinger han persvas

2019 ha RTR lantschà ina concurrenza per ina seria-web rumantscha. Dals dossiers inoltrads èn 6 vegnids tshernids ed ils auturs/las auturas èn vegnidas envidadas ad ina preschentaziun. Selezziunada è alura l'istorgia da Carlo Beer ed Urs Berlinger vegnida. L'istorgia ha persvas cun la tematica dal mitus rumantsch da la «Metta da fein» che prest mintg'uffant sursilvan enconuscha.

*Quel mitus accumpogna mai gia dapi l'uffanza. Quella ditga ha adina fascinà mai. Or da quella raschun hai jau vuli integrar quel mitus en noss scenari, crear in'istorgia e prender las aspectaturas ed ils aspecturs en quest mund, di Carlo Beer, il reschissur da la seria web.*

Per la realisaziun da la seria-web ha RTR collavurà cun la firma da produzioni «Filmgerberei GmbH». Quest team ha planisà e produci la seria dal casting fin al tagl final e collavura stretgamain cun il manader dal project, Flavio Deflorin da RTR. Per la filmada han els pudì incumbensar acturas ed acturs enconuschents sco Marietta Jemmi, René Schnoz, Curdin Caviezel e Roman Weishaupt.

#### «Metta da fein» era sin «Play Suisse»

Sper «rtr.ch» e «Play RTR» vegn la seria-web era preschentada sin la nova plattafurma da la SRG SSR «Play Suisse». «Play Suisse» è ina plattafurma da streaming cun cuntegns da tut las regions linguisticas e sa focusescha sin persunalisaziun e recumandaziun. Uschia po «Play Suisse» offrir ina seleziun curatada d'atgnas produziuns e da co-produziuns da tut las unitads d'interpresa da la SRG SSR. Quai èn films, serias, films documentars, reportaschas e perlas ord l'archiv. «Play Suisse» è unic, perquai che las utilisadras ed ils utilisaders pon scuvrir cuntegns e tematicas da l'entira Svizra, da tuttas quatter regions linguisticas da noss pajais: Tut ils cuntegns èn disponibels en lingua originala cun suttitels en tudestg, franzos e talian. Insaquants films pon ins era guardar cun suttitels rumantschs. Sper l'emprima produziun rumantscha «Metta da fein» datti da guardar ina schelta da films da «Cuntrasts», il film d'animaziun «Ma vie de Courgette» ed il film istoric da dus parts «Gotthard».

Las quatter episodas da la seria-web «Metta da fein» vegnan preschentadas a partir dals 13 da december 2020, a las 20:15, sin [www.rtr.ch](http://www.rtr.ch), [www.playsuisse.ch](http://www.playsuisse.ch) e sin l'app «Play RTR». RTR recumonda la seria a personas a partir da 16 onns.

#### In mitus vegn leventà da mort en vita

«Metta da fein» è in mitus che è surtut enconuschent en la Surselva. La figura misteriosa e sgarschavla spaventava surtut ils uffants. La figura misteriosa taglia giu las chommas als uffants che van tras il prà, avant ch'il pur ha segà quel.

**Dapli infurmaziuns:** RTR, Tamara Deflorin, scheffa comunicaziun, tel. 058 136 30 23, [tamara.deflorin@rtr.ch](mailto:tamara.deflorin@rtr.ch)